

Verbâl de riunion dal Consei Gjenerâl dai 12 di Dicembar dal 2024

Clamât adun cun letare dai 18 di Novembar dal 2024, joibe ai 12 di Dicembar dal 2024 aes sîs sore sere si à dât dongje in presince tal sît sociâl di Palaç Mantica in Vie Manin 18 a Udin e a distance in modalitât telematiche il Consei Gjenerâl de Societât Filologjiche Furlane, par discuti dal ordin dal dì metût ca sot:

1. Leture e aprovazion dal verbâl de volte prime;
2. Comunicazions dal President;
3. Intervents pe sede di Udin;
4. Nomine di Socis benemerits;
5. Setemane de Culture Furlane 2025;
6. Ativitâts sociâls e propuestis dai conseîrs;
7. Variis, se dal câs.

Ae clamade dal President Vicario a rispuindin i Conseîrs:

- *in presince* Colussi, Dei Rossi, del Torre, Franco, Frisano, Garzoni, Madriz, Navarra, Ruffini, Sclipa, Sello, Varutti Elio, Venuti, Vidoni;
- *a distance* Bello, Carlon, Castellarin, Della Mora, Fadelli, Contin, Medeossi, Miotto, Mitri, Muzzatti, Pagnucco, Pati, Perini, Petris, Radivo, Stel, Tirelli, Vezzi, Zanello.

Si son justificâts:

Aita, Bulfon, Chiarandini, Cinausero Hofer, Finco, Janežič, Lorenzini, Mariuz, Menegoz, Taverna, Tilatti.

No son:

Bortolussi, Bressan, Casanova, Castenetto, Cossar, Cozzi, Damiani, Davide, Dorissa, Driol, Grossutti, Lovison, Morocutti, Pastres, Perabò, Percotto, Pezzarini, Portelli, Roncali, Salvadori, Sluga, Tassin, Varutti Marta, Venier, Visintin.

PONT NUMAR 1 DAL O.D.D.:

Leture e aprovazion dal verbâl de volte prime.

Il verbâl de riunion dal Consei Gjenerâl dai 20 di Jugn dal 2024 al ven fat bon a la unanimitât.

PONT NUMAR 2 DAL O.D.D.:

Comunicazions dal President.

Il President al inzorne il Consei cun rivuart a:

- lis publicazions che a son stadis buridis fûr tai ultins mêis:
 - o *Buine gnot Teo* di Barbara Jelenkovich, conte ilustrade par fruts;
 - o *La fatina di Forni* di Paola Cosolo Marangon, conte par fruts;
 - o *Detulis di Fossalta* di Antonio Gaiardo, par cure di Diego Navarra;

- *Concuardia*, numar unic pal CI Congrès Sociâl, par cure di Franco Rossi e Luigi Zanin;
- *Trê dîs* di Zuan Nardin, prin premi seziun romanç dal Premi San Simon;
- *Vuerîr di splaze*, di Mattia Modde, premi seziun fumuts dal Premi San Simon;
- *I 150 anni dei Saggi Ladini. Graziadio Isaia Ascoli tra storia e attualità*, Ats de cunvigne di studiis (Guriza, 23-24 Novembar dal 2023) par cure di Carla Marcato e Federico Vicario, 29. numar de golaine “Biblioteca di studi linguistici e filologici”;
- *Visiti che tu sês ancje furlan* di Maura Locantore, prin numar de golaine “Pasolini Biblioteca Friulana” in coedizion cul Centro Studi Pier Paolo Pasolini di Cjasarsa;
- *Dutis lis poesiis* di pre Pieri Biasat, par cure di Luca De Clara, 38. Numar de golaine “Agâr”;
- *Impiâ Peraulis* di Celso Macor, in doi volums cu la racuelte des poesiis par furlan cu la traduzion par talian, sloven e todesc, e cun doi saçs di Renate Lunzer e Gabriele Zanello;
- *Spitz Parkli* di Federica Pagnucco, conte ilustrade par fruts;
- *Dizionario Toponomastico del Friuli Venezia Giulia* di Giovanni Frau, 30. Numar de golaine “Biblioteca di studi linguistici e filologici”;
- *Gustà Gurizan* di Roberto Zottar;
- lis rivistis che a son stadis publicadis:
 - *Sot la Nape* 2/2024, dedicât a For Davuatri rincurât di Novella Del Fabbro;
 - *Strolc Furlan pal 2025* par cure di Dani Pagnucco, che al à rincurât ancje il *Lunari pal 2025*, in version di picjâ e di taule.
- il projet *Le botteghe lombarde in Friuli* su la opare di Bernardino da Bissone a valê sui bants storics de Regjon Friûl Vignesie Julie;
- i progjets in vore:
 - *Primis Plus*, su la programazion Interreg Italie-Slovenie, cu la realizazion e gjestion di un Bant pe valorizazion dai lûcs de culture dal Friûl Vignesie Julie traviere la lenghe e la culture furlanis;
 - *Veneto Alto Adriatico. Atlante linguistico delle parlate venete* cul jutori de Regjon Friûl Vignesie Julie e Regjon dal Venet;
- i progjets daûr a jessi sierâts:
 - *Cors pratics in presince e in linie* cu la poie de ARLeF;
 - *Vajont il mio nome è memoria* cul jutori de Regjon Friûl Vignesie Julie;
- ativitâts de biblioteche:
 - *Riviste Friulane*, tal portâl e je stade cjariade la riviste Forum Iulii dal Museo Archeologico Nazionale di Cividât;
 - catalogazion e digitalizazion di libris, dal Font manifescj de Filologjiche
 - inzornament de catalogazion dal Font fotografic Ugo Pellis;
- *Iniziativis e manifestazions*
 - Friuli Doc, dai 12 ai 15 di Setembar a Udin;

- il CI Congrès Sociâl a Cuncuardie dai 6 di Otubar;
 - la schirie di ativitâts pes celebrazion dal centenari dal Atlant Lenghistic Talian:
 - a Turin, ai 26 e 27 di Setembar, la cunvigne *Gli atlanti linguistici nazionali. Prospettive di ricerca nel centenario dell'Atlante Linguistico Italiano*;
 - a Flumisel, ai 7 di Otubar, l'incuintri *Ugo Pellis, il fotografo della parola* cu la presentazion de ativitât di valorizazion e digjitalizazion dal Font fotografic Ugo Pellis – Fiumicello, e la scree de mostre *Le fotografie di Ugo Pellis*;
 - a Gardiscje, tal inovâl dal Congrès dal 1924 che al à inviât il progjet dal Atlant Lenghistic Talian, ai 25 di Otubar l'incuintri *L'Atlante Linguistico Italiano a cent'anni da Gradisca (1924-2024)*; ai 26 la proiezion dal docufilm *L'Atlante della Memoria* di Dorino Minigutti;
 - a Udin, ai 21 e 22 di Novembar, la cunvigne *I cent'anni dell'Atlante Linguistico Italiano*;
 - la presentazion dal *Strolic Furlan pal 2025* e dal *Lunari pal 2025*, ai 25 di Novembar a Udin, in presince e in linie;
 - lis iniziativis inmaneadis a Udin par *Nadâl in Filologjiche*.
- Il Consei al cjape at.

PONT NUMAR 3 DAL O.D.D.:

Intervents pe sede di Udin

Il President al informe il Consei di doi contribûts otignûts di 200 mil euros l'un.

Il prin inte suaze de manovre di assestament regionâl di Lui dal 2024, destinât ae compre di spazis pai archivis de biblioteche e par une sale cors: l'imobil individuât al è logât in vie Manin 6/8: ai 20 di Novembar al è stât sotscriet l'at di compre che al è subordenât ae prelazion di bande de Sorintendence dai bens culturâi; passât chest tiermin si varà di tornâ dal nodâr pal at definitîf e daspò si inviaran i lavôrs pal implant antincendi par depuesit di libris e documents; si conte di sierâ lis voris, ju alestiments e la movimentazion dai libris de sede di Vie Manin a chescj gnûfs spazis dentro de fin dal 2025.

Il secont finanziament al è stât otignût sul PR FESR 2021-2027 cul Bant par “Incentivi per lo sviluppo di progetti volti a valorizzare il ruolo che i musei, le collezioni artistico-culturali e altri prodotti culturali possono svolgere come attori dello sviluppo locale” pal progjet “Palazzo Mantica per Tutti”.

Il President al passe la peraule al Arch. Massimo Bortolotti che al spieghes al Consei l'intervent pe costruzion di un assensôr te cort interne di Palaç Mantica che al permetedi di puartâ i disabili sei al nivel dal ingrès de sale consultazion de biblioteche, sei al plan nobil cun acès al Salon d'onôr “Guglielmo Pelizzo”.

Il Diretôr al precise che inte suaze dal progjet a saran realizâts ancje: l'alestiment di un sistema pes videoconferencis tal salon d'onôr di Palaç, un percors multimediâl par fâ cognossi Palaç Mantica e une publicazion pe infanzie.

A intervegnin:

- Pagnucco, ancje in considerazion de mancjance di spazis in Palaç pes ativitâts de Societât, al propon di destinâ chescj gnûfs spazis aes altris istituzions culturâls che a son in Palaç;
- Ruffini e pant il so preseament pe costruzion dal assensôr.

A ducj ju intervents al rispuint il President.

Ae fin dal pont e jes Madriz.

PONT NUMAR 4 DAL O.D.D.:

Nomine di socis benemerits

Il President al comuniche che l'Ufici di Presidence al à pensât di proponi al Consei la nomine a socis benemerits de Societât di:

- Eddi Bortolussi;
- Giosuè Chiaradia;
- Enos Costantini;
- Anna Madriz;
- Dani Pagnucco;
- Piera Rizzolatti.

Il Consei al fâs buine la propueste ae unanimitât e al dà mandât ae Presidence di verificâ la disponibilitât des personis sorenomenadis a jessi nomenadis socis benemerits de Societât.

PONT NUMAR 5 DAL O.D.D.:

Setemane de Culture Furlane 2025

Il President al informe che la XII edizion de Setemane de Culture Furlane si davuelzarà dai 8 ai 18 di Mai dal 2025.

La Fraie de Vierte si le varà ai 18 di Mai a Torean.

PONT NUMAR 6 DAL O.D.D.:

Ativitâts sociâls e propuestis dai conseîrs.

Il President al conferme che i prossims Congrès a saran ospitâts di Bertiûl (2025) e Tavagnà (2026).

PONT NUMAR 7 DAL O.D.D.:

Variis, se dal câs

A intervegnin:

- Navarria, in riferiment ae resinte riunion de Conference su la lenghe furlane, al segnale la mancjance di docents di furlan tes scuelis primariis, in particolâr tal Gurizan e tal Friûl di soreli a mont, e tes scuelis mezanis e al propon di pocâ la Regjon par intervignî;
- Pati, Bello e Perini a son di acuardi cun Navarria;

- Medeossi al propon che il Centri dal Docuscuele al varès di inmaneâ incuintris di promoziun dal insegnament dal furlan cui docents, dirigjents scuelastics e fameis.

La riunion si siere aes 19.15.

Il segretari verbalizant

Feliciano Medeot